

AKASHVANI AIZAWL

REGIONAL NEWS UNIT



CM

Chief Minister Pu Lalduhoma'n state pawn leh rampawn hmun hrang hranga hna hmu thei tur khawp thiamna neih a pawimawh tih sawiin zirlaite chu Mizoram chauh thlirloa hmun danga hlawhtlin tum zel turin a duh thu a sawi.

He thu hi vawiina Serchhip Sub Hqrs YMA Hall a Serchhip Teachers Association (STA) ten, zirlai titha chawimawina MLA Trophy (Inter Challenge-2025) lawmman a semnaah sawiin Pu Lalduhoma chuan Serchhip District mi chengte zat atanga chhuta India rama ziak leh chhiar thiam tamna bera hetiang hun hman a ni chu thil inhmeah tak a ni a ti a.

Zirlai chawimawina dawng te chu nakin zelah zirlai hlawhtling leh chhawr tlak thiamna neih tum tura fuihin, zirtirtu te pawh an zirlaite enkawlinaah hmasawn tum zel turin a chah a, zirtirtu te nun zirtirna a nih theih nghal avangin an nun pawh an uluk a ngaih thu a sawi.

Chief Minister chuan Mizo ten India ram ril zawka hna hmu thei thiamna an neih a ngaih thu sawiin Central leh state danga hna awmna mizo te kan lut thei mang lo chu thil ngaimawhawm tak a ni a ti a. State pawn ni lo Mizoram Rural Bank hnuaia thawktu lakah pawh mizo ten hnam dang an tluklo thin chu veiawm atih thu sawiin Hna lakna kawng dangah pawh a bika mizote luh dan kawng zawn a ngai thin chu a tlawm thlak tih a sawi.

Serchhipa zirlai titha chawimawina ah hian category 7 ah zirlai pathum theuh chawimawina pek an ni a, Chief Minister hian vawiin vek khan Serchhip District Session Judge Circuit Court hawngin tlaiah Aizawl panin a haw nghal a ni.

(C. Lalhminghlua PTC Serchhip)



OMBUDSMAN SWEARING IN

Larsap General (Rtd) Vijay Kumar Singh chuan vawiin khan Pu C.Lalthanmawia, IPS (Rtd) chu Durbar Hall, Raj Bhavan-ah rinawmna thu tiam tirin Ombudsman (Independent Local Body), Mizoram State atan a lalut.

Vawiina hun hmanah hian Chief Secretary charge la tu Pu H. Lalengmawia chuan Larsap-in Ombudsman atana Pu C.Lalthanmawia a ruatna notification a chhiar chhuak hmasa a. Hemi hnu hian Larsap chuan Pu C.Lalthanmawia chu rinawmna thutiam chham tirin Ombudsman (Independent Local Body), Mizoram State atan a lalut a ni.

Ombudsman (Independent Local Body), Mizoram State lakluhna inkhawmah hian UD&PA Minister Pu K. Sapdanga, AH& Vety. Minister Pu C. Lalsawivunga, EF&CC Minister Pu Lalthansanga, Deputy Speaker Pu Lalfamkima, Leader of Opposition Pu Lalchhhandama Ralte leh mi pawimawh dangte an tel a ni.

Ombudsman (Independent Local Body), Mizoram State atana lakluh tak Pu C.Lalthanmawia hi Kum 1989 khan Mizoram Police Service zawmin, kum 2022 khan Indian Police Service, AGMUT Cadre (Mizoram Segment) ah hlankai a ni a. Mizoram Sawrkarah mawhphurhna pawimawh tak tak chelh tawh thinin, heng zingah hian Director, Fire & Emergency Services, AIGP (Police Modernization), DIGP, Southern Range, Mizoram, Lunglei leh DIGP, Northern Range, Mizoram, Aizawl post-te a lo chelh tawh a ni.

(DIPR)



MOBILE RECOVERED

Bawngkawn Police Station chuan Central Equipment Identity Register kaltlanga mobile phone bo an chhui hnua an hmuhlet 30 chu vawiin khan a neitute hnenah an hlan.

Bawngkawn OC Room-a mobile phone a neitute hnena an pek let hi a vaiin 30 a ni a, thla liam ta August ni 19 leh tun thla ni 19 inkara mobile phone bo an hmuh let te an ni a, kumin March thla atang khan Phone bo 230 an hmu let tawh a, a vaiin cheng nuai 57 man hu an hmu let tawh a ni.

Bawngkawn Police Station hian tun hnaiyah khawlai Ruihhlo vawrh thin mi 13 lai manin ND&PS Act hnuaiah thubuai 13 an ziak lut a, Kumin chhung hian ILP nei lo Bawngkawn Police Station huam chhuanga khawsa ILP violator Mi 148 lai manin thubuai siam sak an ni bawk.

Bawngkawn Police Station Officer in charge Pu Vanlalpeka DSP (Probation) chuan phone bo awm chu CEIR kaltlangin an chhui thin tih sawiin application ah phone number an chhut lut chuan phone bo ah sim card vuah tu zawng zawng leh vuah thin te a lang thei an ti a, CEIR kaltlangin phone ah chuan tu sim card nge an hman mek tih thlengin a lang thei tih sawiin hnuchhui kawngah an awlsam phah a ti a, kuminah Mobile phone bo 200 chuang CEIR kaltlangin hmuh let ani tawh tih a sawi bawk.

(Desk)



AADI KARMAYOGI ABHIYAN

Ministry of Tribal Affairs hmalaknain hnam hnufualte chawikanna tura duan Aadi Karmayogi Abhiyan - Responsive Governance Programme chu ramchhung hmun dang rualin vawiin khan Saitual District-ah kalpui a ni.

District Process ah hian Saitual District chu zone thum (3)-a then niin Saitual, Phullen leh Ngopa zone-ah te then a ni, a ti a. Block Master Trainers (BMT) te chuan an zone theuha VC te, khawtlang mipuite zirtirna an pe chhawng dawn a ni.

Saitual DC Dr. Lalngura Tlau chuan programme ina a tum pakhat chu kum 5 chhungin tribal mite hmasawwna tur ruahmanna mumal tak siam a ni, a ti a, India sawrkar chuan kum 2047-ah India ram chu ram intodelh ah hlan kai a tum tih sawiin Village Action Plan siam hunah khawtlang tana hmasawwna tak tak thlen tur duang thiam turin a chah a ni.

(DIPR)



SEVA PARV

Mipui rawngbawl leh sorkar inrelbawlna tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawwna kawng hrang hrangin kalpui a ni a.

Tun tum Seva Parv hunah chuan Prime Minister Narendra Modi sorkarna hnuaia tribal mite tana hmalakna han tarlang ila..

India ram chu khawvela hnam chi hrang hrang awm khawmna hmun niin, mihring vbch 10 leh nuai 45 chuang cheng anga chhut a ni a. Sorkar laipui chuan tribal mite tan Development budget chu kum 2013-2014 atangin vawi nga chuang laiin tihpun a ni a.

Hei bakah hian scheme hrang hrangte duangin, tribal miten hamthatna an dawn leh eizawwna kawng hrang hrang siamsak chu a tum a ni.

(Newsonair)

